

Nama Reti Kristen?

BAGI KE LIMA

Kitai ENDA TAU ENDA ngasi ka pesan TUHAN!

1. *“²¹Barang sapa ti nerima pesan Aku (Jesus) lalu ngasi ka pesan nya, orang nya meh ti rindu ka Aku. Apai Aku deka rindu ka orang ti rindu ka Aku; Aku empu mega deka rindu ka orang nya lalu ngayan ka diri ngagai iya. ²³....Barang sapa ti rindu ka Aku deka megai (ngasi ka) Jaku Aku. Apai Aku deka rindu ka iya, lalu Apai Aku enggau Aku deka datai ngagai iya lalu diau enggau iya. ²⁴Barang sapa ti enda rindu ka Aku, iya enda ngasi ka (enda nyimpan) Jaku Aku. Jaku ti udah didinga kita ukai enggi Aku, tang datai ari Apai, Iya ti ngasuh Aku.” (John 14:21,23,24).*
 - i. Genteran 21; Jesus madah; orang ti ngasi ka pesan Iya, nya meh orang ti amat nyadi anemiak Iya. Pengerindu tu ukai semina jaku ti pansut ka ari mulut aja, tang iya lebih ari nya. Pengerindu tu dipandang ka enggau pengeran ati sereta ulah kitai. Enti kitai amat rindu ka Jesus, tunjok ka ulah kitai ti endang amat bisi pengeran ati ngasi ka pesan Iya.
 - ii. Genteran 23; Beguna amat enti kitai ngemansang ka diri belajar ka Jaku TUHAN (Bup Kudus) enggau bebendar, awak kitai tau bisi penemu ti dalam lalu bisi pemereti ati pasal pesan Tuhan Jesus ngagai kitai, lalu ulih enggau nya kitai ulih mai Berita Manah nya ngagai sida ti bedau ngelala TUHAN, tauka sida ti agi mabu penemu pasal Jesus. Belajar lalu ngasi ka Jaku TUHAN, tu siti ari jalai kitai tau rindu ka Jesus. Tang bakani pan chara kitai belajar enggau lebih dalam, kitai enda tau nginsit mimit ari batang pengarap ka bendar, ianya Jesus endang Anak Allah Taala, Iya mati nyadi ka piring ti idup nebus dosa kitai, ngelepas ka kitai ari ukum pematil belama iya.
 - iii. Genteran 24; Laban Jesus besaum enggau Apai, Jesus idup nitih ka peneka Apai ti ngasuh Iya. Baka nya mega kitai, laban udah besaum enggau Kristus, kitai mega patut nitih ka peneka Iya. Tanya bakatu; “Nama pengawa ti udah digaga Kristus?” awak ka nya tau ngasuh kitai milih utai ti bendar.
2. Ngasi lalu nangi ka Pesan Allah Taala. *“³Enti kitai ngasi ka Pesan IYA (Allah Taala), nya baru kitai amat nemu IYA. Sapa ti madah, Aku nemu IYA, tang enda ngasi ka pesan IYA, orang nya pemula lalu nadai pengamat dalam Iya”, “⁵Tang barang sapa ti ngasi ka (nyimpan) Jaku IYA dalam orang nya pengerindu Allah Taala nyadi chukup menyana. Tu meh jalai kitai nemu diri besaum enggau Allah Taala. ⁶Barang sapa madah diri mengkang dalam IYA, enda tau enda nitih ka pendiau Kristus. (1 John 2:3-6).*
 - i. Bakani kitai deka nemu diri amat besaum (mengkang dalam) enggau Kristus? Genteran jaku tu meri dua bengkah jalai kitai tau patut nemu; enti kitai ngereja nunda ka pesan Krsitus enggau idup nitih ka peneka Kristus. Nama utai ti di padah ka Jesus patut digaga kitai? Rasul John nyaut tanya kitai dalam bagi 3:23; *“arap ka nama Anak IYA, Jesus Kristus lalu rindu ka pangan diri nitih ti udah dipesan Iya.”* Utai ti patut nyadi ba pengarap Kristian ti bendar, ianya pendiau ti bisi pengerindu. Nya kebuah John nyebut munyi nya, awak ka pengawa ti ditunjok ka kitai tau meri pengandal ati ngagai orang bukai, kitai nya endang amat udah di empu Kristus.

Nama Reti Kristen?

- ii. Genteran 6; ngereja pengawa baka ti udah digaga Kristus tauka idup baka Kristus, ukai reti baka duabelas iko murid Iya, ngaga kereja ajih sereta diregang. Kitai enda ulih nunda pengidup Kristus, nitih ka gaya pengawa ti udah digaga Iya baka, ti nyadi Anak Allah Taala, nitih ka chara Iya mati ka dosa kitai enggau sekeda pengawa Iya ti di kereja Iya ba maya perintah orang Rome kalia. Mengkang dalam Kristus, ianya ngasi ka pesan Iya, lalu nitih ka teladan ti udah digaga Iya enggau penuh pengasi ngagai Allah Taala enggau bekereja dalam pengerindu ngagai orang bukai.

Udah tu peda BAGI Ke Enam – Merita Ka Injil TUHAN.....